

重新得力

經文：列王記上 19:4-8

08-13-06

希伯來 ê 正典中，列王記上、下卷原先互看做一卷。七十士譯本將撒母耳上、下卷和列王記上、下卷稱做王國記。15 世紀 chiah 互希伯來文聖經採納。列王記是記所羅門王朝、分裂王國史，南國殘存到猶太人互巴比倫釋放為止約略四百冬 ê 歷史。經文中有提起 39 位統治者，總是所羅門了後 ê 王，na 不重視宗教，無論 In 佇政治 kap 經濟上按怎有成就，聖經攏簡單記載。暗利王起造撒瑪利亞城，征服摩押，是北國偉大 ê 君王，記事 Kan-taⁿ 八節 (16:21-28)，希西家 kap 約西亞熱心宗教改革，忠心西乃之約，順服上帝 ê 旨意，作者就大篇記載。總是上帝已經漸漸 kā 重心放佇先知 ê 身上，以利亞 kap 以利沙 ê 事蹟有 16 章 (王上 17-19，王下 1-13)。作者無署名，巴比倫他勒目認爲是耶利米所寫。現在 ê 學者認爲大約佇主前 6-7 世紀有兩人將歷代 ê 官方年鑑編輯成書。以賽亞史料有關希西家當政時期 ê 記載 (王下 18:13-20:19)，kap 以賽亞書 ê 記事 (賽 36:1- 39:8) 親像：西拿基立 ê 入侵、希西家 ê 祈禱 kap 生病、以賽亞 ê 預言等等，差不多攏同款，可見 In 用 ê 史料來源同款。

今 á 日聖歌隊 ê 獻詩是 Tù 孟德爾頌 ê 神劇以利亞第 15 首選出來 ê。講道後 ê 回應詩是聖詩 496 首，Tù 第 19 曲選出來 ê。是伊祈求上帝落雨時 ê 祈禱辭。孟德爾頌小漢 ê 時就真天才，20 外歲完成神劇聖保羅了後，伊選以利亞作第二部神劇 ê 題材，因爲以利亞是以色列人心目中尙偉大、尙傳奇性 ê 先知，伊 ê 預言準確、伊互死人復活、又單獨 kap 巴力先知鬥法後來因爲他的祈禱上帝落大雨、尙尾坐火車 chiuⁿ 天。耶穌山頂變貌 ê 時，伊 kap 摩西同齊顯現 (太 17:9)。佇啓示錄最後二個見證人 lóng 有摩西 kap 以利亞 ê 影像 (啓 11:3-6 參 TDNT 2:938-39)。孟德爾頌一方面 mà 是爲著紀念祖先 ê 宗教，所以選擇舊約 ê 角色。伊 ê 第一首神劇聖保羅是描寫保羅佇大馬色 ê 經歷、受洗歸入基督 kap 伊宣教 ê 事蹟，其實 mà 是 té 講他家己，因爲伊本人是 tù 猶太教改信基督。神劇以利亞 ê 前半段描述以利亞按怎拍倒巴力，喚醒以色列人。以利亞是一 ê 堅強正直 ê 人，伊按神 ê 旨意求不落雨，果然三冬半不落雨。三冬後上帝要落雨，吩咐以利亞去見亞哈，亞哈對伊講：「互以色列受災禍 ê 就是你 mah?」以利亞嚇死，當面指責伊講：「陷害以色列 ê m 是我，是你 kap 你 ê 老父 ê 家；因爲 lín 棄 sak 耶和華 ê 誠命，去 tè hiah-ê 巴力。」(18:18) 無打算伊勇敢責備亞哈王，拍倒四百五十個拜巴力 ê 先知了後，一聽著王后耶洗別要取伊 ê 性命，剝夠走無路，只有向上帝求死，伊講：「耶和華 ah，求你取我 ê 性命，因爲我無比我 ê 列祖 khah 贏。」(19:4) 神劇 ê 後半段就是描述以利亞按怎逃過迫害，照上帝 ê 旨意完成使命。以利亞雖罔有偉大 ê 成就，總是伊 mà 有軟弱失敗 ê 一面，咱來看伊如何在軟弱中 óa 靠上帝。

以利亞是一個外口強，內心軟 chíaⁿ、真容易情緒化抑是自我懷疑至到信心軟弱 ê 先知，伊認爲大戰巴力 ê 成就是完全 ê 勝利，亞哈王 kap 以色列人攏親眼看著神蹟，從今以後必然會虔誠信靠上帝。無疑悟煞演變成愛逃走避難，伊 ê 勝利並無得著伊所想像 ê 功效，所以灰心喪氣！伊感覺家己 be-tàng khah 贏列祖，是白活 ê，伊 m-nā 向神發怨言，甚至求死。有時咱爲主作工，忠心勞苦濟濟年，付出真大 ê 代價，得著一寡成果，心內想耶和華必然祝福滿滿，thang 過平安亨通 ê 日子，無打算 iáu 會遇著濟濟困難。咱 mà 是會親像以利亞同款向上帝埋怨：「我忍受夠額啦！我 bò 愛復事奉 ah！」chit 時以利亞 ê 靈性 tú-teh 低潮軟弱孤單 ê 時，總是伊真清楚，上帝 kap 伊同在。以利亞佇一個山洞過冥。忽然上主對伊講：以利亞，你佇 chia 做甚麼？(v. 9 & 13) 以利亞應講：「萬軍 ê 耶和華 ah，我一直專心疼你。總

是以色列人民棄 sak 你 kap in 立 ê 約，tià 你 ê 祭壇，又殺了你所有 ê 先知。現在只 chhun 我一人，In iáu-beh 殺我！(v. 10 & 14)」上帝安慰伊講：「我 tī 以色列中留七千人，伊 ê 腳頭 u bē-bat 跪拜過巴力，伊 ê 嘴 bē-bat chim 伊。」(v. 18) 原文是用未來完成式，因為上帝無受時空 ê 限制，同時 mà 暗示上帝 ê 奴僕作 ê 大誌，可能佇家己 ê 世代 bē-tàng 看見，以利亞 毋免灰心，因為伊並無孤單。上帝指示伊 M-tàng 目矚扣扣看人或是看環境，kan-ta 會看著家己 ê 軟弱 kap 敵人 ê 強勢。當咱目矚仰望上帝 ê 時，雖罔世事猶原互人真驚惶，只要咱堅守真理，為主來戰，其實咱並 bô 孤單，上帝互咱 ê 擔，絕對是咱擔當 ê 起 ê。頂禮拜林鴻信牧師提起，當馬偕來台灣傳道 ê 時，遠離伊所熟識 ê 環境，直到 ka 梅堅霧牧師 kap 蘭大衛醫師相 tú，結果 tāk 工話攏講 bōe 完，因為伊佇台灣實在太孤單。最後伊為著順利宣教，娶台灣人做某，tùi 現今看馬偕宣教事工是成功 ê，伊用耶穌 ê 模式來宣教有教示、宣講 kap 醫療(Mt 4:23)，馬偕一開始傳福音，就同時收學生，預備同工，儲備人才，成立台灣第一間神學院，福音才會 thang 佇台灣傳開，咱講伊 kap 上帝同工，上帝留落來超過七千人互伊。今 á 日咱有真好 ê 機會 kap 上帝同工，無論是林牧師對台灣神學教育 ê 異象，或是咱主日學校長 kap 老師對主日學教育 ê 用心，攏需要咱每一位兄姊直接、間接 ê 參與，包括關心、代禱 kap 奉獻，共同為後一代 ê 神學教育來努力。

v.3-4 以利亞是 hiong 狂逃走，伊行一冥一日，饑、嘴乾又疲勞 ê 情形下來求死，總是感謝主，伊真緊著靠主 ê 恩典重新得著氣力。天使對伊講：「起來食 ah，因為路真遠；你行無法得」(v.7)。東方人比較 bē 曉休邇來恢復身軀健康。台灣 mà 是最近幾冬 chiah 實施週休二日，大家 chiah 慢慢會曉休閒生活。有一句話講歇邇是預備行 koh-khah 遠 ê 路。佇所有 ê 民族中，日本人是尙過勞 ê 民族，前日本首相小淵惠三(eizo Obuchi) 就因為過勞死去。設使上帝 beh 將 koh-khah 重要 ê 使命交託互咱，咱就應該保持身心靈健康，人講：食清、暍宮，人精英。因為事奉主是一世人 ê 代誌，保持上好 ê 身軀狀況面對學習、事奉、聚會和生活 chiah 會有效率。

v8 講天使拍醒以利亞，為伊預備食物互伊有氣力行了四十日暝，到上帝 ê 山，以利亞體會 tiōh 家己雖罔軟弱，上帝照常以單純、堅忍、恆久 ê 疼來疼伊，上帝白白 ê 恩典重新喚起以利亞 ê 心志，佇何烈山頂，耶和華 koh 一 pái 差以利亞為伊奔走事奉。這屬天 ê 飲食是指靈性 ê 更新，mà 是咱常常提起 ê 讀經、祈禱、聚會、服事 kap 宣教。假使咱每日有讀聖經，思想主 ê 話，tú 著試探 ê 時，上帝會佇尙適當 ê 時陣，用伊家己 ê 真理拍醒咱，咱就會佇 chiah-ê 話中得著能力。

以利亞 ê 工作是佇喚醒百姓，互耶和華作 In ê 上帝，伊 ê 一生攏是以上帝 ê 話作根據 kap 行動 ê 準則。順服 kap 忍耐聽候是不容易學 ê 功課，佇咱一生中上帝不斷互咱試煉，一項功課學了，又互咱進卡深 ê 課程來學習。Kah-ná jú 願意事奉 ê 人試煉 jú 濟。總是凡事攏有上帝奇妙 ê 計劃，以利亞 ê 順服帶來極大 ê 神蹟。基督徒 ê 生活是一個按計劃長進 ê 生活，所以教會對會眾除了造就 kap 事工 ê 分享，iáu 有生命 ê 傳達。上帝 ê 話 kap 咱 ê 社會 ê 經驗一定愛相結合。Tùi 以利亞 ê 故事咱 thang 發現，上帝其實是整個故事 ê 主角，伊對人有無限 ê 憐憫 kap 疼痛。同時咱也發現，上帝對人 ê 呼召 mà 是堅持到底 ê。咱 m-nà 佇以利亞身上看著上帝 ê 堅持，mà 向望每一個人 tùi 以利亞 ê 事件上面 ê-tàng 學習：佇別人 ê 需要上看 tiōh 家己 ê 責任；佇家己 ê 軟弱頂面看著上帝 ê 大能。互咱 ê 教會成做一個得著有充分 ê 準備，行各種善事，合上帝心意 ê 教會。